

## La dunna da la Sprella



Foto DRG

L'Alp Dadora da Müstair vegn numnada er l'Alp Sprella. Quest num deriva dad ina dunna ch'ins veseva savens sut l'alp sper ina funtauna, che vegn medemamain numnada la «Funtauna da la Sprella».

En questa cuntrada han da temp vegl vis ils pasters savens ina dunna. Quella era en mongiaschamisch ed aveva nagut sin il chau, er cur ch'igl era grondas fradaglias.

Ina saira ha il signun cumandà al paster dad ir giu tar la funtauna

per aua frestga. Il paster ha obedì, ed essend ina bella glina plaina e fitg cler, aveva el nagina tema. El ha emplenì la sadella cun aua ed ha alura sa fermà per mangiar in pau da quel carschun che cresceva en abundanza sper la funtauna. Cur ch'el ha vulì ir ed ha auzà il chau, ha el vis cun gronda surpraisa ina dunna che seseva giu sper la sadella ch'el aveva pusà sper la funtauna. Cun gronda tema ha el tschiffà la sadella ed è ì spert vers l'alp.

El ha raquintà l'istorgia al signun, ch'era in um pli vegl, e quel sa

metta a rir e dumonda, sch'el nun haja mai udì a quintar da la Sprella. Il paster di da na. Sin quai raquinta il signun, ch'ins aveva vis pliras giadas la dunna da la Sprella.

«In di», raquinta el vinavant, «se-sevan nus avant circa 10 onns sper il tschep da fender laina. Nus, quai era il pur Duri, il paster e jau. Las vatgas pasculavan giu sut l'alp e sa laschavan gustar las flurs S. Giatgen. Tuttenina di il paster: «Guardai vi là, da tschella vart da l'aua, si sper la zundra passa ina dunna. Quella è narra dad ir da là si!»

Nus avain tuts guardà, e quai era propi vair. Nus avain pensà ch'ella s'haja persa ed avain cumenzà a clamar, però ella è ida vinavant senza dar bada. Ella è arrivada fin si sper quel grip nair dadens la pala gronda, ed alura nun avain nus betg pli vesì ella. Ina lunga pezza avain nus cuntinuà da guardar, ma ella nun è betg pli vegnida natiers. Jau pretend che quai era la dunna da la Sprella.»

A viandants e pasters ha ella er gia tschivlà en las ureglias, e quai per regla cur ch'i midava l'aura.